

聖慈俯垂

眷覽采而行之天下幸甚臣等幸甚



一洪武永樂年間官有定員

朝無倖位是以賢能盡職食之者寡近年以
來無功而陞無能而進者日多一日
他如工藝之人逋逃之徒邪術之輩
各尋蹊徑得美職而服章服者充滿
朝市實是虛糜廩祿虧損名器非所以勵賢
能而勸有功也合無今後文職非由

進士監生吏員出身者勿授武職非有軍功者勿陞其已陞除額外文職悉令記名回家待有闕之日聽吏部察其可用者取用係醫卜匠藝出身者悉令各執本藝每月止支食米一石其餘俸錢皂隸俱各革去其軍職非有軍功而陞在錦衣衛帶俸及管事者俱改調在京各衛帶俸止食原俸原無俸者每月亦止與食米一石

餘俸俱各革去悉令差操俱不許管軍管事兩京一例若在成化十一年以前陞用及貴戚之家循例而陞者悉令照舊其在京考滿該陞官員內樂舞生出身者止於太常寺官天文生出身者止於欽天監官醫生出身者止於太醫院官匠人出身者止於工部所屬文思院營繕所等衙門官敘用俱不可授以六部都察院通政

司大理寺等衙門堂上官庶不虛費
錢糧混亂名器

一近聞太監梁芳差鎮撫梁山舍人梁
用馳驛前來兩准運司關支

欽賜官鹽五萬引着該司官出備包索船錢用
銀數多該司無從措置被其逼迫今
奉

明詔不許勢要之家中鹽雖稱前鹽係是
欽賜之數百姓愚昧難以戶曉未免致疑又令

運司出備包索船錢人情愈加不堪
伏乞

聖裁合無將梁山等取回前鹽住支今後各處
鹽課俱各存留以備邊儲敢有仍前
求討者許戶部及科道官糾劾使人
無覬覦官有儲積

一南京朝陽門外漆園原設百戶二員
甲軍一百餘名每三年一次行取直
隸廬州府人匠二十名到園開漆所

得漆不過二百斤椶園原設百戶一員甲軍一百餘名每三年一次行取江西南昌府土民八名到園剥椶所得椶毛不過二百斤俱差內官一員監看開剥桐園原設百戶二員甲軍二百四十名每年行取應天府油戶不限名數到園收領桐子打油除存種子外所得油止有一百餘斤俱送內府南京丁字庫交收南京工部遇有修造

黃戰船隻等項又去該庫關支合無今後止令該園餘丁自行開漆剥椶及雇人打油免再行取廬州等府開漆人匠剥椶土民打油人戶及免差內官監看所得生漆椶毛桐油照數就送本部交收庶使事體不繁出納兩便

一南京兵仗局見有

欽差內官四員名帶領匠作一十四員名在局

成造擺朝軍器五萬七千五百頂副
經今三年未完緣地方災傷人民缺
食南京工部及應天府措置物料借
倩夫匠并應天府供給下程等項俱
各艱難合無將前項軍器暫且停止
收過各項物料公同南京工部并應
天府委官查盤見數收貯官庫待後
豐收之年行令南京守備太監提督
該局照數成造仍將各項物料應減
重勞料不虧費

一南京

御用監內官監等衙門每年起運竹木板枋
數多撥船裝載沿途拽運勞人乾淺
去處又行起車裝載勞人尤甚況連
年災傷人民流亡合無將前項竹木
板枋停止一二年以後減半起運庶
使人無怨嗟料有撙節

一端人正士何代無之異端邪術世亦
常有所貴察其忠良辨其奸妄而登
用之擯斥之爾逆者員外郎林俊經
歷張黻以言事謫官尋蒙收

召復其職任國師繼曉以左道惑衆亦被放
逐遣歸田里此足以彰

陛下天地之量日月之明容受其直而特爲寬
貸洞燭其誣而不爲欺妄也竊惟諸
司之中固嘗有先林俊張黻而被謫

者天下之大亦豈無後繼曉而行術
者合無吏部通查數年以來有因言
事或降調外任或冠帶閑住悉令復
職俾圖自効如有政令缺失仍許直
言無隱及令都察院行委巡城御史
五城兵馬嚴加禁治如有奸妄之徒
或執巧技或挾邪術者不許潛住京
師希求進用敢有窩藏隱匿者罪及
鄰佑如此則異端不至橫流正道可

免榛莽

一各處府州縣學廩增生員近年以救荒許納粟銀入監出身中間多有白丁錢虜或在學無成或入學未久或臨期冒報有司急於應令起送不暇詳審如此生徒學業未成禮節未習僥倖入監束書日計若又放回依親寧無忌肆或暴橫鄉里或干謁官府日後選用懵焉面墻妨政害民寔多

有之合無分送南北國子監不許放回依親着令自備柴米坐堂肄業本監學官用意講授務俾成材庶他日選用不至瘠曠

一正統天順年間南京龍江大勝二關各止差內官內使三員名守把

皇城各門并都城各門各止差內官內使二員名守把近來龍江關差太監奉御共六員大勝關差內官內使共七員

名

皇城各門差內官內使十餘員名都城各門有差內官內使五七員名者亦有三四員名者又

內府南京甲字等九庫比先年間每庫止有內官內使二員名公同該庫官收支錢糧今各庫有內官內使五七員名者亦有十三四員名者政出多門弊難枚舉合無行令內外守備官將各

門各關并各庫添差官員盡行革退令其各管本等職務照依正統年間事例存留把守管理免致多占官軍庫役妨誤公務

一在京鍼工巾帽二局每年各差內使二名管送布絹等物前來南京染作却裝回京與內官做造衣被巾帽等件該與在京內官者就被給散該與南京內官者帶來南京給散差來內

使在南京有住半年者亦有住七八箇月者有司日逐供給艱難占用馬快船及洗箱軍軍民人夫數多有妨差操兼且一往一來不無勞擾合無今後北京內官衣被巾帽等件就在北京做造給散南京內官衣被巾帽等件就在南京做造給散庶免往來勞涉搔擾軍民

一南京龍江廠原係民間納糧田地先年設立堆放楠木俱已用盡止存朽爛不堪者數根其該廠房屋墻垣俱各坍塌見今地土空閑仍前占用軍餘一百餘名看守合無將地土給還原主領種辦納錢糧朽爛木植變賣銀兩入官看廠軍餘退回原衛當差於官無損於民有益

一直隸蘇州等府買辦年例供應器皿項下黃紅羅黃紅絨金箔銀硃二硃

生漆桐油熟銅熟鐵鏡面錫等項及
四川布政司折納歲辦皮張項下生
漆熟鐵等項多是差人齎價前來南
京收買却被攬頭光棍誑騙花費或
被解人舖行通同侵分中間情弊多
端難以枚舉以致前項物料不得完
納有誤造作合無今後南京工部將
前項物料價銀分派各該司府徵收
起解本部轉送應天府官庫收候買

辦送用若有積出附餘銀兩准作下
年之數其一時物料內有高貴及價
銀內有不敷本部另行處置庶使情
弊可革工程易完

一應議官子孫在京法司有奏

准事例徑行提問今南京法司但應議官子孫
有犯俱先提事內人問理有礙將原
告并干證人監候羈候奏

請提問有行提數月并半年之上不出官者及

至問完不拘徒杖罪名一槩監候請旨發落未免久候及監候人難合無查照在京法司事例前項應議官子孫有犯除皇親外其餘有犯亦就提問問完之日徒罪以上監候杖罪以下羈候俱奏

請發落庶爲便益

一南京御馬監每年起運首着種子四十扛俱係南京太僕寺坐派養馬軍衛有司辦納蓋是先年北京地方不

產此種以此取去播種今北方已種六七十年豈無種子可種今却仍舊起運以事言之雖小而徵歛解納之際所費實多皆出自軍民合無行令南京御馬監今後不必行取首着種子解京庶免科擾下人受害

一

朝廷差內臣在浮梁縣景德鎮燒造御用磁器今已年久雇覓夫匠買辦柴土類

料及供給監燒官員人等每年用銀
不下數千餘兩俱是饒州等三府小
民出備雖曰磁器計其所費不減銀
器之價近聞原差內臣隨陞太監鎮
守江西往來提督而家人常川在彼
生事尤甚供給益侈即今三府之民
疲敝困苦不可勝言且饒州鄱陽湖
迤邐數百里上控荆襄之衝一有警
急民窮財盡何以爲備此三府之民

誠可痛憫而燒造之役所當急罷也
况所燒磁器年積月累其數必多合
無暫且停燒造三五年以蘇民困待
後缺用再行燒造亦未爲晚

一雲南福建浙江等處雖有出產銀冶
府分其間或屢有頑梗之徒嘯聚爲
非地方人民因而不安者况中間鎮
守太監或有於每年冬月親去前項
府分煎銷銀課往來供應頭目人等

甚是勞擾合無今後止令專管銀場
布按二司官員每年督完銀課解至
總司會同太監煎銷實為民便
右件臣等略陳一得之愚如此伏惟

皇上仁孝恭儉敬

天勤民宜乎天人交感協氣嘉生而乃年不順
成災異迭見者無他皆由臣等不能仰副
聖明所致乞將臣等罷歸田里別選賢才任用
庶回天意成化二十一年二月初七日

題三月初八日奉

聖旨是文武醫匠等官取回支鹽鎮撫并禁造
寺觀降調官員已處置了板枋免運一年大
勝等關門官軍着南京守備太監定奪具奏
成造軍器納粟生員坐監買辦物料提問應
議官子孫該衙門看了來說造給衣帽等件
起運首宿仍舊看廠軍餘量留二十名磁器
燒完了停止其餘准議行陳俊等不准罷歸
着盡心辦事該部知道欽此

乞休致奏狀

臣係陝西西安府耀州三原縣人由進士
改庶吉士正統十四年

欽除大理寺左評寺歷陞左寺副知府左右布
政使成化元年

欽陞都察院右副都御史撫治流民二年以功
陞本院左副都御史巡撫河南一年陞南
京刑部左侍郎管部事九箇月餘丁父憂
服除改刑部左侍郎總理河道年半有餘

改南京戶部左侍郎管部事將三年半復
改都察院左副都御史巡撫雲南陞本院
右都御史仍前巡撫一年有餘改南京都
察院右都御史叅贊機務陞南京兵部尚
書仍叅贊機務共一年有餘改兵部尚書
兼都察院左副都御史巡撫南直隸蘇松
等處地方總理糧儲五年有餘復改南京
兵部尚書叅贊機務今又一年有餘臣以
卑鄙庸材仰荷

聖明知遇歷官凡十六轉任事幾四十年或入陪廟堂或出巡方岳

寵榮已極感幸何加徒懷犬馬之心莫報

乾坤之德第以衰朽應合退閑已嘗再三上章

懇乞休致俱蒙

聖留勉留俾之仍前理事今臣年已七十例該

致仕又且老病侵尋心雖仍戀

闕庭力實不堪鞭策食焉無補居之弗安伏

乞

聖慈矜憫將臣放歸田里另選賢才以充任使

庶不妨賢悞事斯有益於

國家矣臣下情無任感激隕越之至

加陞太子少保謝恩疏

昨臣以右都御史尚書九年考滿具

奏取進止而蒙

聖恩加臣太子少保照舊管事者伏念臣性資

愚魯學術空踈荐歷崇階累叨重寄無補

於世有愧於心具

奏之時自謂官已踰分年已衰老得一致仕
足矣不意今日荷茲

殊恩臣有以見

陛下不遺踈遠之深恩寵異老臣之盛德也感
激良深未易云喻第臣職守南都不能入
侍

左右少效忠勤補報萬一但願

皇圖鞏固

聖壽齊天

前星依

帝座以常輝

主器守

宗廟而永泰非獨臣感

恩思報之心如此而天下臣民愛戴祝願之心
亦莫不如此也臣無任瞻

天仰

聖激切屏營之至除望

闕謝

恩於今年二月初一日到任管事外具本專差
千戶李賢齋捧稱

謝謹具奏

聞

督修 孝陵工完奏狀

照得成化二十二年五月十九日欽奉

勅命 臣同守備太監張本嚴督內外該管官員
併工修理

孝陵 臣遵奉

勅旨會同太監張本并守備內外官員恭詣

孝陵同該管太監鄭強隆平侯張祐工部侍郎
劉俊等看得

孝陵殿宇門廡碑亭等項俱已修完惟明樓已
抓縛鷹架做造斗科等件止因四川原採
大楠木未到未曾拆修又看得周圍牆垣
除修完外止有一千七十丈未完及鄰漿
糶房牆垣損壞六十五丈未曾修理隨令
各官督工修築完備於本年六月初五日

疎放軍夫匠作暫且歇工候催楠木至日另行擇日興工及將修完工程用過物料價銀口糧并原辦未到物料總數開坐具題外至二十一年四月內楠木方到本年七月十二日又節該欽奉

勅命臣同守備太監錢能嚴督原管太監鄭強隆平侯張祐工部侍郎劉俊并內外該管官員量撥用工官軍匠作毋令空閑役占計算在官合用物件并價銀及支給錢糧毋令冒

妄浪費仍逐日併工修造早爲完備欽此臣又遵奉

勅旨同太監錢能行令鄭強張祐劉俊等量撥官軍匠作南京欽天監擇於本年七月二十一日興工修理興工之後鄭強等日逐躬親提督工程郎中毛科專管收放物料工價臣等亦常不時前去督併執役之人各盡心力罔敢怠忽將明樓大梁及角梁枋桁斗科椽望銅絲簷網券門

寶山城垣金水橋墁欄板等項但係損壞者俱各脫換修理揭寃墁砌彩畫油漆至本年三月二十一日工完會同守備內外官員并該監官詣前拜觀羣情莫不忻悅仰惟聖祖在天之靈亦可以少慰矣先該臣等行令郎中毛科自興工日爲始日逐做過工程用過物料并工價銀兩等項每半月一次開報逐旋查筭工完之日臣等又行通前查筭明白除令南京工部照依工部原行

事理將修完工程用過物料等項另行造冊奏繳外緣係奉

勅督修

孝陵工完事理具本專差指揮石文通齋捧謹具題 知

將順 上意匡輔時政疏
臣伏聞近有

聖旨禁約今後不許擅便奏討陞官及遷轉各人名下并文武外官邊將及奏討蟒衣并替

人討蟒衣及不許奏要在內府騎馬又聞自
有此之後諸色人等俱不敢

進貢物件希冀陞賞

朝政肅然小大之臣罔不畏

天之威駿奔承事中外臣民聞之莫不懽忻鼓
舞稱頌

聖德而詠歌太平也夫此數者不禁止則官及
私昵而政事爲之不立利歸拳門而邊儲
爲之不足豪右兼并而小民爲之困敝名

器混淆而上下爲之無別僭踰日肆而禮
法爲之蔑如紀綱廢弛而教化爲之不行
人皆知此數者之爲

聖政累久矣但恐禍及身家所以多不敢言去
歲正月

皇上因天變

勅諭文武百官令其陳奏敝政兩京臣僚間有
言及之者或指陳失真或言詞過當是以
多不蒙採納間有採而行之者不久又行

更改而言者反遭笞謫間有優容者其心
兢兢業業常不自安有若官校之隨其後
所以前事日益滋熾而無已有志爲國者
日益畏縮而不敢言也茲者

皇上不因左右之言臣僚之諫而有此禁約是
蓋

皇天眷佑國家將隆萬年無疆之休故啓

宸衷而爲之此臣民間之所以歡忻鼓舞而稱
頌詠歌也然此數者誠能持之堅禁之久

而無所變更則天下國家何患乎不治安
宗廟社稷何患乎不靈長四夷八蠻何患乎不
賓服羣黎百姓何患乎不蒙福也如或持
之不堅禁之不久而有所變更非惟有失
大信於天下抑恐難保無虞於將來伏望
皇上執此之政堅如金石行此之令信如四時
仍將節次

聖旨禁約事意傳與在京各衙門并科道知道
今後但有故違

勅旨奏討前項

恩澤者俱照

勅旨內叅奏其奉

特旨批出傳奉而與者亦要執奏不可有失大信如此則紀綱振肅而教化大行億兆歸仰而

宗社靈長矣然臣此言非欲矯情以沽名而舍生以取禍但欲成

皇上之美政爲恃寵者弭後患耳惟

聖明察其心而赦其罪幸甚具本專差辦事官徐徽齋捧謹具奏

聞

孝陵工完受賞謝 恩疏

伏蒙

聖恩以臣同守備太監錢能奉

勅督修

聖祖孝陵工完

賜臣紵絲一表裏生鈔一千貫者竊惟臣猥

以章句之腐儒叨膺叅贊之重寄凡百
朝命皆當奉行矧夫

陵寢工程敢不躬親提督經之營之乃百工之
成效輪焉奐焉豈一夫之用心臣實無功
何敢望

賞辭之恐蹈不恭之罪受之難逃非分之譏
揣已則踧踖不寧感

恩則汪洋無際除叩頭祇領望

闕謝

恩外具本專差辦事官舒光發齎捧赴

闕稱

謝謹具奏

聞

王公奏稿卷之六

王公奏稿後序

古有謨若禹曰克艱臯陶曰知人安民益
曰無怠無荒迺臣告君之嘉言爾後之章
奏即謨也其紀綱之大體義理之至情政
事之要道具於是關繫大矣哉蓋自古人
君莫非忠臣弼而朝廷正天下理以經綸
大經謀猷大業天工其代股肱倚毗不可
相無而相舍故用其言則國福以興棄其
言則國禍以亂若龜筮之孚灼然而不誣

者然臣必能盡其忠俾君其堯舜君民其堯舜民庶幾無負所任而亦不過爲分內也何忠者爲麟角爲鳳嘴靳靳乎不多見耶忠其難矣乎夫忠者盡其所當然而無歉焉爾盡已則盡物盡物則盡道非昭天理弗能也非大有義弗能也非抱貞固弗能也非純誠不欺弗能也非剛直不阿弗能也非大公無私弗能也能焉則政無不舉知無不行陳其善閉其邪利害當機極

言無諱已不求知而自爲人不見知而不悔烏有嫌疑窺避哉盡已而已矣若今大司馬陝右王公其人焉公號介菴歷事

三朝敷歷中外幾四十載讜論滿

朝廷忠名滿天下始評大理平反克允刺揚州吏民赤子布政江西河南長城數千里撫荆襄撫中州總河防撫雲南守陪都撫南畿安危康濟居司寇居司徒居司馬都臺憲佑辟經邦前後章疏餘二百上真大

體立於紀綱至情切於義理要道深於政
事偉哉言乎古人之心也使今征求息而
民力甦權奸伏而士氣作

君心明而成憲彰是誰之功歟蓋公存心以道
始末惟忠蓄有學問本源施爲實用其厚
如此所以揚翹特立風采凝峻盛德休望
光明正大爲國之楨也詩曰衮職有闕惟
仲山甫補之公其謂歟書曰政貴有恒辭
尚體要今公之言忠誠剴切流出肺腑而

摛繪之浮辭可謂深得乎體要者矣將見
千載之下讀之者未必不與陸宣公之奏
議諸葛武侯之出師二表並稱也耶公懋
辱厚公雅敢以荒謏辭謹載拜序其槩
成化十八年壬寅十二月吉日無錫陳公
懋書

書介菴王公奏稿後

徃在

憲宗朝聞三原王公爲南京部臺章奏迭至奉
旨施行者固已錄之有司播之四方其留中不
報者世莫得而傳也公旣爲

今天子簡用復起爲吏部有傳其家所藏奏稿
者蓋自爲評事爲知府爲布政凡所嘗陳
奏舉劾者皆在焉觀其剖析事理論法斷獄
人或能之至於批鱗苦口排大姦摧巨敵

身任天下而不爲私謀者則卓乎不可及也夫內告外順見于君陳之命先儒以爲此固成王之言非文武之言也中古之世或匿諫草而不以示人甚則焚之世俗相傳以爲美事議者則以爲孔光之徒匿茹釣譽之爲者故韓魏公諫垣存稿寧不避賣直之嫌而彰人主從諫之美豈無所見而然哉若王公所諫奏所舉劾蓋有削兵權黜侍近而元惡大憝亦有肆諸市朝者

則公之忠

先帝固鑒之深矣雖有危言極論未暇宣布然亦優而容之未始有譴怒訶責之語

盛德所在亦豈容掩而不彰哉使天下傳之後世傳之謂公之言如此而

先帝之所以容之者如此則未必非是稿之助也

弘治壬子四月六日

中順大夫太常寺少卿兼翰林院侍講學

士

經筵講官兼修

國史長沙李東陽書

介菴王公奏稿後跋

大冢宰三原王公清忠大節著天下章縫
士識與不識莫不知推尊之顧其平生章
奏徃徃傳聞于人而全帙多未之覩慕公
者蓋日企焉久矣侍御東魯王公徃使關
中以風節高峻爲公所期重且道雅相合
因錄得疏草二百餘篇每攜自隨茲奉

命按江南激揚之暇思欲廣之以資有志事功
者因謂我郡守林侯曰三原公一代耆德

固今後輩楷模況敷歷既久所建明多地
方事亦司風紀者之所宜習也盍刻而傳
之俟勵精郡政雅志遠大欣然請捐俸督
其成以余之居郡下也遂授而俾編焉魯
魚謏勞微效刊正得八十六篇釐爲六卷
其再起爲吏部時論撰又不在是大凡校
編事宜皆請質二執政而後定眇焉末學
直董書而已旣成復承命志所由刻古語
云惟賢知賢信然哉公之大勲業自筆太

史固非愚生之所敢論侍御公按茲周稔
執法秉公始終一心而侯篤尚惠愛以風
化率下皆所謂三原公之徒歟且公桃李
滿門晚得相知乃更在四海之內則知君
子道同則合雖千載猶金蘭契非是鄰壻
旦暮而後相爲謀也侍御公言公引年家
居後在邑城外數里許築草堂日著書其
中以爲課今年垂九十而聰明強健好學
不衰且增廣古今章疏甚富其自得而不

忘世又如此公又間語侍御公曰士大夫必劄得脚住然後可以有爲亦名言也敢併志云

弘治十五年歲次壬戌十一月望日後學吳郡楊循吉拜手謹書

介菴奏稿六卷舊刻之姑蘇三原公故里也公逝矣時縉紳知公者重其名思其手澤之新惟公不可見得見是集也斯可矣然乃不能應諸縉紳之求欲圖廣之乃因舊本別爲三集逾冬功始克成讀其辭直而不隨婉而經危而不激仰承俞允播宣中外時則有若削兵權出侍近誅大姦惡以丕覃

聖化華夏夷服想望風采是固

聖明從諫好善之懿夫其轉移孚動果敢剴毅
公之精微固自有不可及者公歿之明年
啓充來尹三原又三年奏稿重刻說者謂
公之質直如長孺心事如希文奏疏如包
孝肅好學如衛武公表正鄉閭如陳太丘
一時出處屹然

朝宁俾善類賴有以立是集也猶吾足徵也
惟公不可見得見是集也斯可矣遂藏棗
于弘道書院併志歲月以傳

正德七年壬申冬十有二月

賜同進士出身知三原縣事嘉州後學程啓
充拜書